

DOMENIE XVIII «VIE PAL AN»

Antifone di jentrade Sal 69,2.6

Salvimi, Diu,
spessee a difindimi.
Tu sêts tu il gno ripâr e la mè difese;
Signôr, no sta intardâti!

Colete

Vuarde, Signôr, i tiei fameis
e da la tò eterne protezion a di chei che te domandin;
a di chei che si tegnин in bon di vêti par lôr creadôr e paron
rinove lis robis che ti plasin e ten cont di ce che tu âs rînovât.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Is 55,1-3

Vignît e mangjait.

Dal libri dal profete Isaie
Vualtris che o vêts sêt, vignît chi des aghis;
ancje chel che nol à bêçs, vignît!
Comprait e mangjait cence bêçs
e cence spindi vin e lat!
Parcè mo spindêso bêçs par chel che nol è pan,
e si strussiaiso par chel che no us sacie?
Scoltaim ben, mangjait robis buinis
e o gjoldarêts une mangjative sauride.
Slungjait la orele e vignît chi di me,
scoltait e la vuestre anime e vivarà!
E o fasarai cun vualtris un pat par simpri,
il boncûr che nol mole imprometût a David.
Peraule di Diu.

SALM RESPONSORIÂL dal Salm 144

R. Spalanche la tò man, Signôr, sostente ducj chei che a vivin.
Il Signôr al è pazient e di boncûr,
pegri tal inrabiâsi e splendit te misericordie.
Al è bon cun ducj il Signôr,
il so afiet al rive sun dutis lis sôs voris. R.

I vòi di ducj viers di te si voltin e ti spietin,
e tu tu ur dâs di mangjâ su l'ore juste.
La tò man tu tu spalanchis
e tu sostentis fin avonde ducj chei che a vivin. R.

Il Signôr al è just in dutis lis sôs stradis,
sant in dutis lis sôs voris.
Il Signôr ur sta daprûf di ducj chei che lu clamin,

di duej chei che lu clamin cun scletece. **R.**

SECONDE LETURE Rm 8,35.37-39

Nissune creature no rivarà par mai a distacâns dal amôr di Diu in Crist.

De letare di san Pauli apuestul ai Romans

Fradis, cui rivaraial a distacâns dal amôr che Crist al à par nô? La tribulazion, la pôre, la persecuzion, la fan, la nuditât, i pericui, la spade?

Ma in dutis chestis robis nô o stravincìn in fuarce di chel che nus à volût ben. Di fat o soi sigûr che ni muart, ni vite, ni agnui, ni potencis dai agnui, ni cumò, ni avignî, ni altecis, ni profonditâts, ni nissune altre robe creade no rivarà par mai a distacâns dal amôr che Diu al à par nô, in Crist Jesù nestri Signôr.

Peraule di Diu.

CJANT AL VANZELI cf. Mt 11,28

R. Aleluia, aleluia.

Vignît di me, ducj vualtris che o sêis stracs e masse cjamâts,
e jo us fasarai polsâ, al dîs il Signôr.

R. Aleluia.

VANZELI Mt 14,13-21

Ducj a mangjarin fin passûts.

Dal vanzeli seont Matieu

In chê volte, cuant che al vignì a savê de muart di Zuan Batiste, Jesù al partì di li cu la barcje par ritirâsi tun lûc desert. Lis folis, a pene savût, a tacarin a lâi daûr a pît, si che, cuant che lui al rivà, al cjacà une vore di int. Alore al sinti compassion par lôr e al vuarì i lôr malâts. Sore sere, si fasserin indenant i siei dissepui a dîi: «Il puest al è desert e e je za passade l'ore. Torne a mandâ indaûr lis folis, par che a ledin tai bores a comprâsi di mangjâ». Ma Jesù ur rispuindè: «Nol covente che si 'nt ledin; daitjur di mangjâ vualtris». Lôr i rispuinderin: «No vin nuie chi, dome cinc pans e doi pes». E lui ur disè: «Puartaitmai chi». I ordenà a la int di sentâsi su la jerbe. Po al cjacà i cinc pans e i doi pes e, alçâts i vôi viers dal cil, al disè la preiere di benedizion, al crevâ i pans e ur ai dè ai dissepui e lôr a la int. E ducj a mangjarin fin passûts; dai tocs restâts a puartarin vie dodis sportis plenis. Chei che a vevin mangjât a jerin sui cinc mil oms, cence meti in cont feminis e fruts.

Peraule dal Signôr.

Su lis ufiertis

Santifice, Signôr te tô bontât, chescj regâi
e, daspò di vê acetade l'ufierte de vitime spirituâl,
fasinus deventâ ancie nô une ufierte eterne.

Par Crist nestri Signôr.

Antifone a la comunion Sap 16,20

Tu nus âs preparât, Signôr, un pan dal cil,
un pan in grât di dâns ognî contentece
e di sodisfâ ognî gust.

O ben: Zn 6,35

Al dîs il Signôr: Jo o soi il pan de vite.
Chel che al ven di me nol varà plui fan

e chel che al crôt in me nol varà plui sêt.

Daspò de comunion

Compagne cu la tô continue protezion, Signôr,
chei che tu âs ristorât cul regâl dal cîl
e fâs deventâ degns de redenzion eterne
chei che no tu ti stufis mai di vuardâju.
Par Crist nestri Signôr.